

Grad Novi Pazar

Skupština grada

Odbornička grupa SDA Sandžaka

Novi Pazar

13. jun 2022. godine

P R E D S J E D N I K U
SKUPŠTINE GRADA NOVOG PAZARA

Na osnovu člana 44. stav 1. i člana 149. Statuta grada Novog Pazara („Službeni list grada Novog Pazara“, broj 6/19), člana 44. stav 1. i člana 138. stav 1. Poslovnika Skupštine grada Novog Pazara („Službeni list grada Novog Pazara“, broj 6/19) podnosimo **PRIJEDLOG ODLUKE O POKRETANJU INICIJATIVE ZA IZMJENU I DOPUNU PRAVILNIKA O ORGANIZACIJI I OSTVARIVANJU NASTAVE U PRIRODI I EKSKURZIJE U OSNOVNOJ ŠKOLI**, sa prijedlogom da se, shodno članu 109. Poslovnika Skupštine grada Novog Pazara, uvrsti u dnevni red na sjednici Skupštine grada koja će se održati 14. juna 2022. godine.

Predsjednik odborničke grupe

Ahmedin Škrijelj

PRIJEDLOG

Na osnovu člana 20. stav 1. tačka 10), člana 32. stav 1. 20), člana 79. stav 1. tačka 2) Zakona o lokalnoj samoupravi („Službeni glasnik RS“, broj 129/2007, 83/2014 – dr. zakon, 101/2016 – dr. zakon i 47/2018) a u vezi sa članom 6. Zakona o zaštiti prava i slobda nacionalnih manjina ("Službeni list SRJ", br. 11/2002, "Službeni list SCG", br. 1/2003 - Ustavna povelja i "Službeni glasnik RS", br. 72/2009 - dr. zakon, 97/2013 - odluka US i 47/2018), člana 46. stav 1. tačka 77) i člana 147. Statuta grada Novog Pazara, („Službeni list grada Novog Pazara“, broj 6/19), i člana 137. Poslovnika Skupštine grada Novog Pazara („Službeni list grada Novog Pazara“, broj 6/19), Skupština grada Novog Pazara na sjednici održanoj 14. juna 2022. godine, donosi

O D L U K U

o pokretanju inicijative za izmjenu i dopunu Pravilnika o organizaciji i ostvarivanju nastave u prirodi i ekskurzije u Osnovnoj školi

Član 1.

Skupština grada Novog Pazara, ovom odlukom, traži od Ministra prosvjete, nauke i tehnološkog razvoja da izmijeni i dopuni član 10. stav 6. Pravilnika o organizaciji i ostvarivanju nastave u prirodi i ekskurzije u Osnovnoj školi ("Službeni glasnik RS", br. 30/2019).

Član 2.

Skupština grada Novog Pazara konstatuje da je postojeću odredbu člana 10. stav 6. Pravilnika o organizaciji i ostvarivanju nastave u prirodi i ekskurzije u Osnovnoj školi ("Službeni glasnik RS", br. 30/2019) potrebno izmijeniti i dopuniti na način što će se:

- kao sadržaji ekskurzije u drugom ciklusu osnovnog obrazovanja i vaspitanja, koje je potrebno posjetiti, utvrditi i kulturno-historijski, vjerski i drugi objekti i lokaliteti koji su odraz identiteta pripadnika nacionalnih manjina u cilju razvijanja duha tolerancije među učenicima;
- kao jedno od područja gdje se može relizovati nastava u prirodi i ekskurzije, predvidi i područje Sandžaka;
- uvažiti činjenica da je "Republika Srpska" dio suverene države Bosne i Hercegovine, s tim u vezi propisati pravo na ekskurzije na teritoriji cijele Bosne i Hercegovine a ne samo na jednom njenom dijelu;

- omogućiti jednako pravo da se za učenike sedmog i osmog razreda, pripadnike nacionalnih manjina koji pohađaju nastavu na svom maternjem jeziku, ekskurzije mogu organizovati i izvan teritorije Republike Srbije, i to u državama u kojima njihovi sunarodnjacima tradicionalno i u značajnom broju žive.

Član 3.

Ovu odluku dostaviti Ministru prosvjete, nauke i tehnološkog razvoja.

Član 4.

Ovu odluku objaviti u "Službenom listu grada Novog Pazara".

SKUPŠTINA GRADA NOVOG PAZARA

Broj:

U Novom Pazaru, _____. _____. 2022. godine

PREDSJEDNIK

Dr. Anela Šemsović

O B R A Z L O Ž E N J E:

Pravni osnov za donošenje odluke:

Pravni osnov za donošenje ove odluke je sadržan je u:

- članu 20. stav 1. tačka 10) Zakona o lokalnoj samoupravi;
- članu 32. stav 1. tačka 20) Zakona o lokalnoj samoupravi;
- članu 79. stav 1. tačka 1) i 2) Zakona o lokalnoj samoupravi a u vezi sa članom 6. Zakona o zaštiti prava i slobda nacionalnih manjina;
- članu 46. stav 1. tačka 77) Statuta grada Novog Pazara;
- članu 147. Statuta grada Novog Pazara;
- članu 137. Poslovnika Skupštine grada Novog Pazara.

Razlozi za donošenje odluke:

Ovim prijedlogom odluke predlaže se resornom ministru prosvjete, nauke i tehnološkog razvoja da izmijeni i dopuni Pravilnik o organizaciji i ostvarivanju nastave u prirodi i ekskurzije u Osnovnoj školi.

Razlog za pokretanje inicijative za izmjenu i dopunu ovog podzakonskog akta jeste taj što je članom 10. stav 6. tog Pravilnika utvrđeno da se ekskurzije za učenike sedmog i osmog razreda mogu organizovati samo na jednom dijelu Bosne i Hercegovine, što je posebno problematično i sporno kada su u pitanju pripadnici bošnjačkog naroda.

Istim Pravilnikom nije propisana mogućnost da se i za učenike koji pripadaju manjinskim narodima i pohađaju nastavu na svom maternjem jeziku ekskurzije mogu organizovati u državama u kojima njihovi sunarodnjaci tradicionalno i u značajnom broju žive.

Pravilnik ne nudi mogućnost posjete kulturno-historijskim, vjerskim i drugi objektima i lokalitetima koji su odraz identiteta pripadnika nacionalnih manjina u cilju razvijanja duha tolerancije među učenicima što je suprotno Ustavom iskazanom namjerom da u Republici Srbiji društvo, pored ravnopravnosti, počiva i na principu tolerancije i poštovanja različitosti u nacionalnom, vjerskom, jezičkom i svakom drugom smislu. Postojeći Pravilnik ne predviđa učeničke posjete objektima od značaja za Bošnjake. Shodno tome predloženo je da se navedeni Pravilnik dopuni na način što će se kulturno – historijski, vjerski i drugi objekti i lokaliteti koji odražavaju identitet i kulturu nacionalnih manjina predvidjeti kao sadržaji ekskurzija i nastave u prirodi.

Područje Sandžaka nije predviđeno kao jedno od područja gdje se može realizovati nastava u prirodi i ekskurzij. Imajući u vidu da su Bošnjaci većinsko stanovništvo u Sandžaku, broj učenika

koji nastavu pohađaju na bosanskom jeziku, te prirodna bogatstva koja Sandžak posjeduje, predloženo je da se i područje Sandžaka uvrsti među područja u kojima je moguće realizovati nastavu u prirodi i ekskurzije.

Iako je članom 3. istog Pravilnika propisano da je jedan od ciljeva organizovanja nastave u prirodi i ekskurzija za učenike u Osnovnoj školi između ostalog i razvijanje pozitivnih odnosa prema nacionalnim i kulturnim vrijednostima. Navedeni Pravilnik, međutim, ne daje mogućnost da se istaknuti ciljevi ostvare na pravi način kada su u pitanju učenici koji pripadaju manjinskim narodima i pohađaju nastavu na svom maternjem jeziku.

Članom 80. Ustava Republike Srbije i članom 6. Zakona o zaštiti prava i sloboda nacionalnih manjina, pripadnicima manjinskih naroda zagaranovano je da mogu nesmetano održavati i razvijati veze i saradnju sa sunarodnjacima izvan teritorije Republike Srbije. Ovim Pravilnikom, čija za izmjena i dopuna traži, to pravo se suspenduje.

Sistem obrazovanja i vaspitanja, u svim svojim segmentima, treba biti ustrojen na način da isključuje svaki vid diskriminacije i systemske nejednakosti među učenicima bez obzira na nacionalnu pripadnost i jezik na kome pohađaju nastavu.

Donošenjem ove odluke, Skupština grada Novog Pazara, koja je zakonom ovlaštena da se stara o ostvarivanju manjinskih prava a čije većinsko stanovništvo čine pripadnici bošnjačkog naroda predlaže pravično i adekvatno rješenje kako bi se otklonile negativne posledice koje proističu iz ovog Pravilnika i otklanja systemsku diskriminaciju prema učenicima koji pripadaju manjinskim narodima i pohađaju nastavu na svom maternjem jeziku.

Objašnjenje pojedinačnih rješenja propisanih ovom odlukom:

Član 1: Utvrđen je predmet odluke.

Član 2: Utvrđeni su konkretni prijedlozi u kom dijelu i u kom smislu treba izmijeniti i dopuniti navedeni Pravilnik.

Član 3: Propisana je obaveza dostavljanje ove odluke Ministru prosvjete, nauke i tehnološkog razvoja.

Član 4: Propisana je obaveza objavljivanja u ove odluke u „Službenom listu grada Novog Pazara“.

Finansijska sredstva za sprovođenje ove odluke obezbijediće se u budžetu Grada Novog Pazara.

